



**Äntwert vun der Madame Justizminister Elisabeth Margue op d'parlamentaresch Fro n° 2406
vum 3. Juni 2025 vun der honorabel Députéiert Stéphanie Weydert zum Sujet "Sécurité et
prévention dans les prisons"**

Mir wéilten hei op d'Äntwerten zu de parlamentaresche Froen n° 1295 an 1643 verweisen, déi och dës Thematik behandelt hunn.

1) Wéi vill Virfäll mat Gewalt géint Justizvollzugsbeamten goufen an de Prisongen zu Lëtzebuerg an de leschte fënnef Joer registréiert ? Kann d'Justizministesch dës Donnéeën pro Joer a pro Prisong opgeschlësselt zur Verfügung stellen ?

Et gëtt op d'Äntwert op d'parlamentaresch Fro n° 1643 verweisen, déi d'Donnéeën pro Joer a pro Prisong opschlësselt.

Fir d'Joer 2025 goufen et bis elo am Centre pénitentiaire de Luxembourg (CPL) dräi Aggressioune géint Membere vum Personal. Am Centre pénitentiaire d'Uerschterhaff (CPU) gouf dräi Mol vun engem Prévenu a Richtung vun engem Member vum Personal gespaut. Am Centre pénitentiaire de Givenich (CPG), war bis elo dës Joer nach keen Incident.

2) Wat fir Moosname huet d'Regierung geplangt oder schonn ëmgesat, fir Gewalt an de Prisongen ze verhënneren an d'Sécherheet vum Personal ze garantéieren ?

Säit der Ouverture vum CPU stellt d'Prisongsverwaltung eng Verbesserung vun der Sécherheet am Strofvollzuch fest. Virun allem gesäit een e Réckgang vun den Incidents géint Agenten säit de CPU all déi männlech Prévenuen ophëlt, a just verurteelt Stroftäter an all weiblech Gefaangen am CPL zu Schraasseg sinn.

Et muss een awer och festhalen, datt esou Incidents oft de Fait vun nëmmen e puer gewaltbereete Prisonéier sinn, déi reegelméisseg an där Hisiicht opfalen.

An den dräi Prisonge gëtt et ee ganz ëmfangräiche Kamera-lwwerwaachungssystem, den et erméiglecht nodréiglech Aggressioune géint Agenten oder soss Strofdoten oder disziplinär Infractionne genoe ze erkennen an ze dokumentéieren.

D'Sécherheet am Prisong, an dozou zielt natierlech och déi physisch Integritéit vun den Agenten, ass eng vun den absolute Prioritéiten an dofir gëtt et och ee ganzen Arsenal un Déngschtvirschrëften, déi fir déi noutwenneg Sécherheetsgarantien am Prisongsalldag solle suergen. Et handelt sech dobäi ëm direkt Sécherheetsvirschrëften, déi zum Beispill detailléiere wat an ee Prisong dierf erakommen, wat an engem Prisong verbueden ass, wéi Visiteuren an och



aner Intervenanten, le cas échéant, kennen oder musse kontrolléiert ginn, een absolutten Alkohol- an och Drogeverbuert fir jiddereen, dee bannent de Mauere schafft oder do festgehal gëtt, a viles méi. Et gëtt awer och Virschrëften iwwert Verhalens- a Bewegungsmuster, déi zur Sécherheet bäidroen.

Säit 2024 ass et och en obligatoreschen Deel vun der Formatoun vun den Agenten u Self-Defense-Coursen an u Coursen, déi den Agenten Desescalationstechnike vermëttelen, deelzehuelen. All Agenten hunn déi Formatoun duerchlaf.

An dem Kontext gi säit engem Joer och während der Formatoun verschidde klassesch Sécherheetssituatiounen per Rollespill ageübt, fir den Agenten doduerch eng praxisorientéiert Ausbildung, déi de reelle Begebenheeten an Ufuerderunge vum Terrain entsprécht, kennen unzibidden.

All Persoun, déi a Kontakt mat Prévenuen oder mat Verurteelte kënnt, an domadder och all Agenten, sinn obligatoresch mat engem Funk ekipéiert, deen se ëmmer musse bei sech droen. Dee Funk funktionéiert iwwerall um Site vun engem Prisong an huet zousätzlech nach eng Alarmfunktoun mat där zu all Moment ka Verstärkung ugefrot ginn, wann eng Geforesituatioun entsteet. Et gëtt och nach aner technesch Equipementer, déi och a bestëmmte Fäll zur Verbesserung vun der Sécherheet vum Personal bäidroe kennen.

Donieft gëtt et am CPL an am CPU eng Unitéit vun Agenten (GRIP), déi eng ganz adaptéiert a renforcéiert Ausbildung fir Interventiounen mat erhéichtem Risiko oder mat spezielle Preventiounsmesuren hunn. Déi Equipe stinn Dag an Nuecht zur Verfügung a sinn och mat dem noutwennege Material ekipéiert.

Et dierf een awer ni aus den Ae verléieren, datt de mënschleche Facteur am Prisong eng extrem wichteg Roll spillt. Den Haaptaccent muss dofir ëmmer op der Präventioun leien, Präventioun duerch den Asaz vu geléierten Techniken, duerch Versteesdemech, duerch Empathie an Ecoute an och duerch kloer Applikatioun vun transparenten a bekannte Reegelen.

3) Gëtt et eng systematesch Evaluatioun vun esou Virfäll, fir déi adequat Präventiounsmoossnamen ze analyséieren a weiderzeféieren ? Wéi ginn d'Beamten op esou Eskalatiounen virbereet, z. B. Duerch Formatounen oder spezifesch Trainingen ?

Bei all Incident, och bei enger Tentative, gëtt systematesch ee Compte-rendu d'Incident redigéiert, all Beweiser gesammelt a gehalen an all implizéiert Zeien (esou gutt op Détenussäit wéi op Personalsäit) gehéiert an déi Depositounen ginn all schrëftlech festgehalten. Wa méiglech ginn och Fotoen als Beweismëttel gemaach.



All Incident gëtt duerno um Niveau vum jeeweilege Centre pénitentiaire opgeschafft a wann de Verdacht besteet et kéint sech dobäi ëm eng Strofdot handeln, gëtt den Dossier systematesch dem zoustännegen Procureur d'État iwwermëttelt. Parallel, gëtt gepréift ob géint den Auteur vum Incident en Disziplinarverfahren ageleet gëtt.

Fir eng gréisstméiglech Eenheetlechkeet vun der Prozedur an där Matière tëscht den dräi Prisongen ze garantéieren, gëtt all Compte-rendu d'Incident, dee Gewalt géint een Agent betrëfft och un den Département de l'inspection interne et de la surveillance vun der Prisongsverwaltung geschéckt, fir ze kucken a wéi fern et sech ëm e systemesche Problem handelt, an/oder ob et derwäert ass, dorausser och Conclusiounen fir déi net betraffe Prisongen ze zéien.

Et ass ze ernimmen, datt um Niveau vun der DAP säit 2025 de Service bien-être au travail (S-BET) besteet. Nieft villen aneren Aufgaben am Interêt vum gesamte Personal vun der Verwaltung intervenéiert dës Service bei gréisseren Virfäll automatesch bannent maximal 24 Stonnen (gréisser Feier, Suiciden, aner kritesch Situatiounen, déi eventuell en Impakt op d'psychologescht Befanne vum Personal kënnen hunn). Dës Interventioun ass awer just als eng Zort éischt Hëllef geduecht fir gréisseren Schied virzepräifen. Sollten d'Psychologe vum S-BET der Meenung sinn e betraffene Member vum Personal bräicht weider Hëllef oder eng psychologesch Therapie, dann orientéieren si d'Persoun zäitno bei déi entspriechend Servicer.

De Service S-BET steet awer och nach an den Deeg no engem Incident op Demande vun de Betraffenen zur Verfügung, sief et och nëmme fir ze kontrolléieren ob do keng ze vill staark Belaaschtung statt fonnt huet.

Lëtzebuerg, den 3. Juli 2025

D'Justizministesch

(s.) Elisabeth Margue